

Visoki predstavnik apelira na političare da ubrzaju reforme u oblasti zakonodavstva i zapošljavanja

Visoki predstavnik Paddy Ashdown obratio se u utorak poslije podne bh. zastupnicima i delegatima na zajedničkoj sjednici Zastupničkog doma i Doma naroda bh. Parlamenta i pozvao sve članove Parlamenta da usvoje neophodne zakone kojim će promovirati vladavinu prava i ekonomsku obnovu zemlje.

Nakon petnaestominutnog obraćanja Parlamentu, Visoki predstavnik je sat vremena odgovarao na poslanička pitanja. Takav dijalog sa Parlamentom se smatra najboljim načinom izgradnje uspješnog partnerstva sa članovima Parlamenta.

Visoki predstavnik je istakao da je novi osjećaj fokusa prepoznatljiv u cijelom regionu, s obzirom da zemlje već usmjeravaju svoja nastojanja u pravcu veće integracije u evropske tokove. Visoki predstavnik je u svom obraćanju takođe pomenuo da upravo tu činjenicu odražava i jučerašnji samit Predsjedništva BiH i predsjednikâ Hrvatske i Jugoslavije.

Međutim, osjećaj za konkretnost treba općenito postati očigledan i u provođenju svakodnevne politike. Visoki predstavnik je citirao prijedlog članova Parlamenta Federacije BiH da se povećaju beneficije za boračku populaciju, uprkos činjenici da sredstva za predloženo povećanje ne postoje i da MMF prijeti sa povlačenjem preko 100 miliona američkih dolara u vidu zajmova planiranih za ovu godinu, ukoliko bi Parlament odobrio takav budžetski fijasko.

“Teško je zamisliti bilo koji segment društva koji je za svoju zemlju žrtvovao više od samih boraca“, izjavio je Visoki Predstavnik, ali “kada je pomoć u opadanju, a dugovi u

porastu", nastojanja u pravcu povećanja boračkih penzija bi mogla dovesti do bankrota. Na kraju bi trpila cjelokupna populacija, uključujući i borce. Visoki predstavnik je rekao da bi prijedlog zakona takođe uništio odnose BiH za MMF-om, te otjerao i druge međunarodne finansijske institucije.

Visoki predstavnik je apelirao na poslanike da odmah usvoje, između ostalog, i Zakon o posebnom vijeću BiH Suda i posebnim odjelima za borbu protiv organiziranog kriminala, Zakon o veterinarstvu (na osnovu kojeg će bh. poljoprivredni proizvođači konačno moći prodavati svoje proizvode na tržištu Evropske unije), Zakon o koncesijama, Zakon o registraciji pravnih lica i Zakon o statistici. Visoki predstavnik je takođe apelirao i na brzo donošenje Zakona o javnom rtv servisu, koji je osamnaesti po redu i zadnji zakon na spisku smjernica Evropske unije. Usvajanjem tog zakona, kojim bi se obezbijedila pravna zaštita slobodnih i pravičnih medija u BiH, otvorio bi se put za pregovaranje BiH o Sporazumu o stabilizaciji i pridruživanju Evropskoj uniji.

Visoki predstavnik će se obratiti Narodnoj skupštini RS-a 26. jula i Parlamentu FBiH 30. jula.